



伯公下

記得正上小學時節，在伯公下搞到斷烏無半夜，無想著莊項伯公祠個大門嘎分人鎖起來，共伴个一隻一隻像猴仔樣攀過圍牆出去，單單伸個一儕在伯公下、大門肚。心煩腦急之下，乜想蹶上門鎖、攀過大門轉屋家去，一無注意，大門頂高像箭樣个細鐵精，好死毋死就撞爛衫褲刺入吾个左手腋下，阿姆哀哀過正得，黏邊血流血著，痛到耐毋得！好得大人看著遽遽同儕扞下來，送去分先生止血、消毒、包藥仔。記得該日暗晡當恬靜，無分大人罵，乜無食著大人專門為做毋著事个細人仔準備个「竹筱板」。這下，每擺看著左手腋下个一點疤，就想起小南埔伯公下个故事。

還記得伯公下圍牆胥頭，有一頭牛眼樹，到地避暑就會結出一波一波个牛眼，探入伯公下這片來。該係在伯公下搞寮个細人仔最好个零搭，較高个人伸手就摘得著，較矮个人就愛練會爬牆蹶樹伶俐个功夫，無成，正經會搶毋著來食！食伸个牛眼核，毋會打爽，搞伴仔會拿來做 king' kang`搞，講也奇怪，仰會搞到有意有思！伯公个後背有一頭香花，但个名仔聽講安到——夜來香，到地開花个時節，斷烏開始就會散放醺醺个香氣。伯公下貪搞个細人仔，總會帶等香味轉屋家，該時節，歸莊个人當像就鼻得著該夜來香味。

伯公下，係係做細人仔時節搞寮个地方。逐日放學，小南埔莊項个細人仔打紙牌仔、射樹奶仔、搞 king' kang`，大體仔就會行到伯公下。麼人較會搞、麼人較戇當、麼人較奸幸？在搞个過程全全展現出來，搞伴仔目金金，伯公乜看現現。係輒常恁想，假使童年係一齣相賽輸贏个戲，莊項个伯公下，就係最打眼个舞臺。舞臺項無刀光劍影，但係有紙牌仔、樹奶仔、king' kang`還有搞伴仔；舞臺項無血流血著个場面，但係有緊張、刺激个心情；舞臺項無尖酸刻薄个評審，但係有笑微微仔个伯公，永久，深刻在童年个畫面裡肚。

伯公下係係童年重要个舞臺，所有在舞臺項演出過个人，係還記得：共綱个搞伴仔，隔壁武頓个阿戊伯公當虔誠奉祀清瘦个伯公，慈祥个阿戊伯婆晒鹹菜个身影，輒常食酒醉講心事个阿富伯……，全全還留在吾个印象裡肚。年紀緊來緊大，恁著伯公下，就恁起童年時節；恁起莊項，恁起自家个莊項人。這下，小南埔莊項个伯公下已經無圍牆、無大門，乜無細人仔在該停跔搞寮。毋過，還做得看著莊項人帶等自家个子女，過年過節在該敬伯公。

作者：邱一帆

☆詞彙學習☆

【斷烏】ton' vu'：天黑。

【搞伴仔】gau` pan' e`：玩伴。

【戇當】ngong dong：傻憨。

【king' kang`】：玻璃珠、彈珠。

☆文法學習☆

【無……乜無……】沒有……也沒有……。

例 1：佢當乖，無分人打過，乜無分人罵過。（他很乖，沒被人修理過，也沒有被人罵過。）

例 2：佢恁久愁慮到無食乜無睡。（他最近憂愁得沒吃也沒睡。）